

Byaij Haeuj Ndaw Rungj Seizcin Bae

走进春天的怀抱里



Seizcin daengz lo, gyoengq-vunz cungj duet buhmienz nanwt roengzdaeuj, vuenh hwnj buhmbang, byaij haeuj ndaw seizcin bae, yawjyawj gingisaek seizcin.

Ndaw suenva, va gomak-gingq hai ndaej ceiq caeux, limqva de dwg luenzgyaeq, ndaw

saekhau cab miz saekmaeq. Mbungqmbaj caeuq duzrwi vungvung veve gongz dwk heux dujva mbin bae mbin dauq, gou roxyiuj, gyoengqde dwg aeu faenjva. Gou hix dep gyawj dujva, yungh rengz nyuq, raq heiqhom he ndonj haeuj conghndaeng gou bae, caen hom ha! Gvaiq mbouj ndaej duzrwi caeuq mbungqmbaj cungj deng yinx gvaqdaeuj lo!

Ndaw gunghyenz, nye faexliux daeuq ok di heuloeg he, nye de raezrangrang, lumj byoem raez dahniq nei; nyeliux unqnemnem, dwg gaiqcouzheu cug gwnz ndang dahsau seizcin ba? Ngazfaex oiqnemnem daj gwnz nye-liux ndonj aen'gyaeuj iq ok-

daeuj, gyoengqde youq ndaw rungj rumzcin bi bae bi dauq, lumj ninz youq ndaw gyoivenj nei cwxcaih dangqmaz.

Ngiengx gyaeuj muengh, gwnzmbwn mbin miz gak saek gak yiengh yiuhrumz, miz yiuhrumz duzyiuh, yiuhrumz mbungqmbaj, yiuhrumz duzbyagim……daihgya mwngz gyaep gou buet, cungj siengj swnh rumzcin raeujrub cwxcaih mbin youq gyangmbwn.

Seizcin geijlai gyaundeit ha! Gou gamjdaengz swgheij coemj haeuj ndaw rungj seizcin bae, daengx aennadang cungj yungz youq ndaw seizcin lo.

(sam nienzgaep Vuz Yezhanz)

Canghyw Roegdingfaex

啄木鸟医生

环江思恩镇西南小学二年级 罗家玉

Youq ndaw ndoengfaex, gofaex mwncup, duzroeg caeuq doenghduz youq ndaw ndoeng vaiqvued dwk gvaq saedceij.

Miz ngoenz ndeu, gofaex daxgoeng gamjdaengz ndang in raixcaix, ndangdaej ngoenz beij ngoenz nyieg, mbawfaex hix ciemhciemh loenq roengzdaeuj lo, laxlawz dwg gofaex daxgoeng baenzbingh lo. Duz roegdingfaex rox le mbin gvaqdaeuj, laxlawz roegdingfaex couhdwg canghyw. Roegdingfaex yawjraen gofaex daxgoeng baenzneix nanzsauh, coenz vah ndeu mbouj gangj couh bang yw bingh lo, de diegneix dotdot, dieghaenx dotdot, couh ra ndaej yenzyinh lo. Roegdingfaex mbouj lau sinzhoj dawz duznon daj ndaw congh laeg dot okdaeuj, dawz non dot sat lo, ndang gofaex daxgoeng hix mbouj in lo. Roegdingfaex doiq gofaex daxgoeng naeuz: "Gij bingh haih ndang mwngz gou cawz bae lo, gvaq geij ngoenz mwngz couh ndei lo." Gofaex daxgoeng naeuz: "Docih mwngz, canghyw!" "Mbouj yungh docih, gou dwg canghyw, neix dwg gou wnggai guh. Gou lij bae bang bouxwnq yw bingh, couh mbouj caeuq mwngz gangj lai lo." Gangj sat roegdingfaex youh mbin bae gizwnq bang bouxwnq yw bingh lo.

(指导老师:罗少维)



Daxboh, Cingj Mwngz Cuengqsim

爸爸，请放心

Daxboh youq Gvangjdungh guhhong. Ndwencieng, daxboh ma ranz lo, de daiq gou cuengq bauqrengh, bae gunghyenz guhcaemz, gou ngoenzngoenz cungj gvaq ndaej gig vuenyungz.

Geij ngoenz gonq, daxboh youh dauq bae Gvangjdungh hwnjban lo. Mwh bae soengq daxboh, gou daej ndaej gig haenq, daxboh hix daej lo. Yawj baihlaeng daxboh, gou youq ndawsim laeglemx naeuz: "Cuengqsim ba, daxboh! Gou itdingh ndeindei doegsaw, youq ranz dingq vah daxmeh, bang daxmeh guh hongranz. Mwngz yaek gingciengz dwk dienhvah ma ranz bw! Gou maqmuengh caeux di raen daengz mwngz!"

(ngeih nienzgaep Vwnz Cing)



Giuj Baen Dangauh

巧分蛋糕

Daxmeh cawx ndaej aen siengring he, siengj sawq swgheij gag guh dangauh. Ngoenzsinghiz, gou iu 7 boux doengzdoih daeuj cimz gij dangauh daxmeh guh haenx. Hoeng aenvih aenq mbouj cinj, liuh guh dangauh yungh liux lo, daxmeh cij guh ndaej 7 aen dangauh ityiengh hung.

"Gou mbouj gwn lo, sou moix vunz aen ndeu." Gou miz di mbouj ndei eiqsei q naeuz.

"Dou moix vunz baen mwngz di ndeu couh ndaej lo." "Mbouj ndaej bw, daxheiz guh baenz sinhoj, raeuz baenzlawz gag gwn ne?" "Lij miz boh" au, daxgoeng, daxbuz, hix baen hawj gyoengqde cimz ha!" "Yienghneix raeuz daeuj siengj banhfap." Daihgya mwngz coenz gou coenz daujlun hwnjdaeuj.

7 aen dangauh, yaek bingzyaenz baen hawj 12 boux vunz, baenzlawz baen ne?

"Gou miz banhfap lo, vanzlij moix vunz baen ndaej 2 gaiq dem." Gou soqlaiz suyo z hag ndaej ndei haenx naeuz.

Gyoengqdoih baez dingq, gipmuengz naeuz: "Vaiq di gangj baenzlawz baen!"

Gou mbouj gaenj mbouj menh naeuz: "7 aen dangauh mbouj yungzheih bingzyaenz baen baenz 12 gaiq. Hoeng, raeuz ndaej sien baen 3 aen dangauh, moix aen bingzyaenz baen baenz 4 gaiq, itgungh 12 gaiq, moix vunz ndaej gaiq ndeu. Yienzhaeuh aeu 4 aen lw roengzdaeuj haenx cungj bingzyaenz baen baenz 3 gaiq, cungjgungh hix dwg 12 gaiq, moix vunz gaiq ndeu."

Gou song sam mbat couh baen ndei dangauh, sien hawj daxboh daxmeh caeuq daxgoeng daxbuz moix vunz gaiq hung gaiq iq ndeu gungh 2 gaiq, yienzhaeuh caeuq gyoengqdoih angqfaengfaeng cimz hwnjdaeuj.

(sei q nienzgaep Cangh Swhfanz)

Gou Gangj Gojgaeq Hawj Daxmeh

我给妈妈讲故事

Ngoenzneix daxmeh roengzban ma daengz ranz, gou raen de mbouj daih angq, dwg hwnjban baeg lai, roxnaeuz bungzdaengz gijmaz saeh simnyap ne?

Yawjraen gij yiengh nyapnyuk daxmeh, gou gig sim in, couh gvensim dwk cam: "Meh, mwngz miz gijmaz saeh simfanz ha?" Daxmeh mbouj naihfanz naeuz: "Saeh vunzhang, lwgnyez mbouj rox law."

Gou mbwnjbak cingq yaek byaij bae, sawqmwh siengj ok aen cawjeiq ndeu. Gou doiq daxmeh naeuz: "Meh, gou gangj aen goj ndeu hawj mwngz

ba! Gaxgonq miz buzlaux ndeu, de miz song dah lwg, dahlwg hung haq hawj boux gai mauhdiemx he, dahlwg iq haq hawj boux gai liengj he. Baez daengz ngoenzgvengq, buzlaux coh nanzgvaq dwk naeuz: 'Ngoenzneix liengj lwggwiz iq mbouj ndei gai lo, dahlwg iq saedceij mbouj ndei gvaq ha!' Baez daengz ngoenzfwn, de youh siengj hwnj mauhdiemx ranz dahlwg hung mbouj ndei gai, lijdwg siengsim nanzgvaq. Mboujlwnh dwg ngoenzgvengq roxnaeuz ngoenzfwn, buzlaux cungj dwg mbouj haisim. Boux ranznden he nai buzlaux naeuz:

'Ngoenzfwn mwngz siengjsiengj liengj ranz dahlwg iq ndei gai lo, ngoenzgvengq mwngz couh siengj mauhdiemx dahlwg hung seng'eiq ndei lo. Yienghneix siengj, mwngz mbouj dwg couh ngoenzngoenz angq luma?' Buzlaux dingq gij vah ranznden, roxnyinh gig miz dauhleix, daj seizhaenx hwnj couh ngoenzngoenz angqvauvau lo."

Daxmeh dingq sat aen goj neix le, doeksat dwk cam: "Mwngz dwg daj gizlawz dingq daengz aen goj neix ha?" Gou han naeuz: "Dwg youq gwnz saw yawj daengz. Aen goj neix lwnh



raeuz, mboujguenj bungzdaengz gijmaz saeh, cungj aeu vuenh aen gakdoh he siengj vwndiz, yiengjineix cij bienq ndaej vaiqvued. Gou naeuz ndaej deng lwi?" Daxmeh angq dwk riu naeuz: "Mwngz gangj ndaej gig ndei, daxmeh dingq mwngz."

Yawjraen gwnz naj daxmeh dauq riu hwnjdaeuj, ndawsim gou angq lai lo.

(ngeih nienzgaep Mung Vwnzcez)